

Namo tassa bhagavato arahato sammāsambuddhassa

Suttantapiṭake

Dīghanikāye

Sīlakkhandhavaggasutta

Samgāyanassa pucchā vissajjanā

Pucchā – paṭhamamahādhammasaṃgītikāle āvuso dhammasaṃgāhakā mahākassapādayo mahātheravarā paṭhamam vinayaṃ saṃgāyitvā tadanantaram kaṃ nāma pāvacaṃ saṃgāyimsu.

Vissajjanā – paṭhamamahādhammasaṃgītiyaṃ bhante dhammasaṃgāhakā mahākassapādayo mahātheravarā paṭhamam vinayaṃ saṃgāyitvā tadanantaram dhammaṃ saṃgāyimsu.

Pucchā – dhammo nāma āvuso suttantābhidhammavasena duvidho, tattha kataram dhammaṃ paṭhamam saṃgāyimsu.

Vissajjanā – dvīsu bhante dhammesu suttantābhidhammapiṭakesu paṭhamam suttantaṃ piṭakaṃ dhammaṃ saṃgāyimsu.

Pucchā – suttantapiṭake pi āvuso dīghamajjhimasamyuttaṅguttarakhuddakanikāyavasena pañca nikāyā, tesu paṭhamam kataram nikāyaṃ saṃgāyimsu.

Vissajjanā – pañcasu bhante nikāyesu paṭhamam dīghanikāyaṃ saṃgāyimsu.

Pucchā – dīghanikāyepi āvuso tayo vaggā catuttiṃsā ca suttāni, tesu kataram vagmaṃ katarāñca suttaṃ paṭhamam saṃgāyimsu.

Vissajjanā – dīghanikāyepi bhante tīsu vaggesu paṭhamam sīlakkhandhavaggaṃ, catuttiṃsatiyā ca suttesu paṭhamam brahmajālasuttaṃ saṃgāyimsu.

Brahmajālasutta

Pucchā – sādhu sādhu āvuso mayampi dāni tatoyeva paṭṭhāya saṃgāyituṃ pubbakiccāni samārabhāma..., tenāvuso bhagavatā jānatā passatā arahatā sammāsambuddhena brahmajālasuttaṃ kattha bhāsitaṃ.

Vissajjanā – antarā ca bhante rājagahaṃ antarā ca nāḷandaṃ ambalaṭṭhikāyaṃ rājāgāraṃ bhāsitaṃ.

Pucchā – kaṃ āvuso ārabha bhāsitaṃ.

Vissajjanā – suppiyañca bhante paribbājakaṃ brahmadattañca māṇavaṃ ārabha bhāsitaṃ.

Pucchā – kismiṃ āvuso vatthusmiṃ bhāsitaṃ.

Vissajjanā – vaṇṇāvaṇṇe bhante, suppiyo hi bhante anekapariyāyena buddhassa avaṇṇaṃ bhāsati dhammassa avaṇṇaṃ bhāsati saṅghassa avaṇṇaṃ bhāsati, suppiyassa pana paribbājakassa antevāsī brahmadatto māṇavo anekapariyāyena buddhassa vaṇṇaṃ bhāsati dhammassa vaṇṇaṃ bhāsati saṅghassa vaṇṇaṃ bhāsati, tasmim bhante vatthusmim bhāsitaṃ.

Anusandhe

Pucchā – kati āvuso tattha anusandhayo.

Vissajjanā – tayo bhante tattha anusandhayo, eko avaṇṇānusandhi, dve vaṇṇānusandhiyo.

Paṭhama anusandhe

Pucchā – tathāvuso paṭhame anusandhimhi kathaṃ bhagavatā bhāsitaṃ, taṃ saṃkhepato kathehi.

Vissajjanā – paṭhame bhante anusandhimhi avaṇṇe manopadosaṃ nivāretvā, tattha ca ādīnavaṃ dassetvā, tattha paṭipajjitabbākāro bhagavatā bhāsito.

Mamaṃ vā bhikkhave pare avaṇṇaṃ bhāseyyuṃ, dhammassa vā avaṇṇaṃ bhāseyyuṃ saṅghassa vā avaṇṇaṃ bhāseyyuṃ, tatra tumhehi na āghāto appaccayo na cetaso anabhiraddhi karaṇīyā...

Dutiya anusandhe

Pucchā – sādhu sādhu āvuso, sādhu kho bhagavā attanā paramukkaṃ sāgatakantīguṇasamannāgato attano sāvakabhūte amhepi tattha samādāpesi, attanā ca lokadhammesu aniñjanasabhāvo amhākampi tathattāya ovādamadāsi, dutiyepanāvuso anusandhimhi kathaṃ bhagavatā bhāsitaṃ, tampi saṃkhepato pakāsehi.

Vissajjanā – dutiye pana bhante anusandhimhi vaṇṇe cetaso uppilāvitattaṃ nisedhetvā, tattha ca ādīnavaṃ dassetvā, tattha ca paṭipajjanākāraṃ dassetvā, puthujjanassa vaṇṇabhūmibhūtāni tīṇi sīlāni vitthārato bhagavatā bhāsitaṃ.

Mamaṃ vā bhikkhave pare vaṇṇaṃ bhāseyyuṃ, dhammassa vā vaṇṇaṃ bhāseyyuṃ, saṅghassa vā vaṇṇaṃ bhāseyyuṃ, tatra tumhehi na ānando na somanassaṃ na cetaso abhiraddhi karaṇīyā –

Tatiya anusandhe

Pucchā – sādhu sādhu āvuso, sādhu kho bhagavā attanā paramukkaṃ sagatasuparisuddhasīlasamannāgato, taṃ attano suparisuddhasīlaṃ dassetvā parepi tattha niyojesi, tatiye panāvuso anusandhimhi kathaṃ bhagavatā bhāsitaṃ, taṃ saṃkhepato pakāsehi.

Vissajjanā – tatiye pana bhante anusandhimhi dvāsaṭṭhi diṭṭhiyo sabbaññuta ñāṇena vitthārato vibhajitvā, tāsāṅca cha phassāyatanapadaṭṭhānabhāvaṃ vibhāvetvā, micchādiṭṭhigatikādhiṭṭhā naṅca vaṭṭaṃ kathetvā, yuttayogabhikkhuadhiṭṭhānaṅca vivaṭṭaṃ kathetvā, micchādiṭṭhigatikassa desanājālatō avimuttabhāvaṃ desanājālatō vimuttassa natthikabhāvaṅca vibhāvetvā, attano ca katthaci apariyāpannabhāvaṃ dassetvā, upādisesanibbānadhātuṃ pāpetvā desanā bhagavatā niṭṭhāpitā.

Ucchinnabhāvanettiko bhikkhave tathāgatassa kāyo tiṭṭhati, yāvassa kāyo ṭhassati tāva naṃ dakkhanti devamanussā, kāyassa bhedaṃ uddham jīvitapariyādānā na naṃ dakkhanti devamanussā.

Suttanidesanā

Pucchā – sādhu sādhu āvuso, sādhu kho bhagavā attanā dvāsaṭṭhi diṭṭhiyo ca cha phassāyatanāni ca dvādasa paṭiccasamuppādaṅgāni ca sabbaso pari jānitvā tesam pari jānanatthāya paresampi tathattāya dhammaṃ pakāseti, suttañca nāma āvuso catunnaṃ suttanikkhepānaṃ aññataravaseneva nikkhittaṃ, tasmā tesu idaṃ suttaṃ katarena suttanikkhepena bhagavatā nikkhittaṃ.

Vissajjanā – catūsu bhante suttanikkhepesu aṭṭhuppattinikkhepana idaṃ suttaṃ nikkhittaṃ.

Pucchā – kassa āvuso vacanaṃ.

Vissajjanā – bhagavato bhante vacanaṃ arahato sammāsambuddhassa.

Pucchā – kenāvuso ābhaṭaṃ.

Vissajjanā – paramparāya bhante ābhaṭaṃ.

Pucchā – atthi nu kho āvuso ettha koci viraddhadosā, yena pacchimā janā micchāatthaṃ gaṇheyyuṃ.

Vissajjanā – natthi bhante.

Sāmaññaphalasutta

Pucchā – tenāvuso bhagavatā...pe... sammāsambuddhena sāmaññaphalasuttaṃ kattha bhāsitaṃ.

Vissajjanā – rājagahe bhante jīvakassa komārabhaccassa ambavane bhāsitaṃ.

Pucchā – kenāvuso saddhiṃ bhagavatā bhāsitaṃ.

Vissajjanā – raññā bhante māgadhenā ajātasattunā vedehiputtana saddhiṃ bhāsitaṃ.

Pucchā – taṃ panāvuso suttaṃ catunnaṃ suttanikkhepānaṃ katarena suttanikkhepena bhagavatā nikkhittaṃ.

Vissajjanā – catunnaṃ bhante suttanikkhepānaṃ pucchāvasikena suttanikkhepena nikkhitaṃ bhagavatā.

Ajātasattu

Pucchā – sā panāvuso pucchā kenākārena samuppannā.

Vissajjanā – rājā bhante māgadho ajātasattu vedehiputto tadahuposathe pannarase komudiyā cātumāsiniyā puṇṇāya puṇṇamāya rattiyā yena bhagavā tenupasaṃkamī, upasaṃkamitvā bhagavantaṃ diṭṭheva dhamme saṃdiṭṭhikaṃ sāmaññaphalaṃ pucchi, evaṃ kho sā bhante pucchā uppannā.

Rammaṇīyā vata bho dosinā ratti, abhirūpā vata bho dosinā ratti, dassaṇīyā vata bho dosinā ratti, pāsādikā vata bho dosinā ratti, lakkhaññā vata bho dosinā ratti....

Kaṃ nukhvajja samaṇaṃ vā brāhmaṇaṃ vā payirupāseyyāma....

Yaṃ no payirupasato cittaṃ pasīdeyya....

Charājīvaka

Tvaṃ pana samma jīvaka kiṃ tuṇhīsi –

Ayaṃ deva amhākaṃ bhagavā arahaṃ sammāsambuddho amhākaṃ ambavane viharati.

Taṃ kho pana bhagavantaṃ evaṃ kalyāṇo kittisaddo abbhuggato “itipi so bhagavā arahaṃ sammāsambuddho vijjācaraṇasampanno sugato lokavidū anuttaropurisasadammaṣārathi satthādevamanussānaṃ buddho bhagavā”ti.

Taṃ devo bhagavantaṃ payirupāsatu, appevanāma devassa bhagavantaṃ payirupāsato cittaṃ pasīdeyya.

Tena hi samma jīvaka hatthiyānāni kappāpehi.

Kappitāni kho te deva hatthiyānāni, yassa dāni kālaṃ maññasi.

Ajātasattu

Kicci maṃ samma jīvaka na vañcesi, kacci maṃ samma jīvaka na palambhesi....

Mā bhāyi mahārāja, mā bhāyi mahārāja....

Na taṃ deva vañcemi, na taṃ deva palambhāmi....

Ajātasatta

Eso mahārāja bhagavā, eso mahārāja bhagavā majjhimaṃ thambhaṃ nissāya puratthābhimukho nisinno purakkhato bhikkhusaṅghassa....

Iminā me upasamena udayabhaddo kumāro samannāgato hotu...

Agamā kho tvaṃ mahārāja yathā pemaṃ.

Puccheyyāmaṃ bhante bhagavantaṃ kiñcideva desaṃ sace me bhagavā okāsaṃ karoti pañhassa veyyākaraṇāya.

Puccha mahārāja yadākaṅkhasi.

Yathā nu kho imāni bhante puthusippāyatanāni, seyyathidaṃ, hatthārohā assārohā rathikā dhanuggahā celakā calakā piṇḍadāyakā (peyyāla) gaṇakā muddikā, aññānīpi evaṃ gatikāni puthusippāyatanāni, te tena sippena sandiṭṭhikaṃ sippaphalaṃ jīvanti, te tena attānaṃ sukhenti pīṇenti, mātāpitaro sukhenti, pīṇenti, puttadāraṃ sukhenti pīṇenti, mittāmacce sukhenti pīṇenti samaṇabrāhmaṇesu uddhaggikaṃ dakkhiṇaṃ patitṭhapenti sovaggikaṃ sukhavipākaṃ saggasaṃvattanikaṃ, sakkā nu kho bhante evameva diṭṭheva dhamme sandiṭṭhikaṃ sāmaññaphalaṃ paññāpetuṃ.

Pucchā – tadā āvuso katham bhagavatā rājā ajātasattu vedehi putto paṭipucchito kathañca tena bhagavato ārocitaṃ.

Vissajjanā – “abhijānāsi no tvaṃ mahārāja imaṃ pañhaṃ aññe samaṇabrāhmaṇe pucchitāti, abhijānāmahaṃ bhante aññe samaṇabrāhmaṇe pucchitāti, yathākathaṃ pana te mahārāja byākarimṣu, sace te agaru, bhāsassūti na kho me bhante garu, yathassa bhagavā nisinno bhavantarūpo vāti, tenehi mahārāja bhāsassū’ti, evaṃ kho bhante tadā bhagavatā rājā māgadho ajātasattu vedehi putto paṭipucchito, evaṃ kho bhante tena tadā bhagavato ārocitaṃ.

Pūraṇakassapa ayūvāda

Pucchā – kathañcāvuso pūraṇakassapassa santike pucchāvissajjanā ahoṣi.

Vissajjanā – ekamidaṃ bhante samayaṃ rājā māgadho ajātasattu vedehiputto yena pūraṇo kassapo tenupasaṅkami, upasaṅkamtivā pūraṇaṃ kassapaṃ sandiṭṭhikaṃ sāmāññaphalaṃ pucchi, atha kho bhante pūraṇo kassapo karoto kho mahārāja kārayato, chindato chedāpayato, pacato pācāpayato, socayato socāpayato (peyyāla) karoto na kariyati pāpaṃ tyādinā rañño māgadhasa ajātasattussa vedehiputtassa saṃdiṭṭhi kaṃ sāmāññaphalaṃ puṭṭho samāno akiriyaṃ byākāsi, evaṃ kho bhante pūraṇassa kassapassa santike pucchāvissajjanā ahoṣi.

Pūraṇakassapavāda

Nissiriko vata āvuso pūraṇassa kassapassa vādo anattasaṃhito jigucchanīyo ativiya bhayānako, ye tassa vacanaṃ sotabbaṃ saddhātappaṃ maññeyyumaṃ, tesam taṃ assa dīgharattaṃ ahitāya dukkhāya, ettakeneva aṃja mayaṃ pucchāvissajjanaṃ thapessāma.

Makkhaligosāla ayūvāda

Pucchā – purimadivase āvuso mayā sāmāññaphalasuttassa nidānapariyāpannāni pucchitabbaṭṭhānāni kānici kānici pucchitāni, tayā ca suṭṭhu vissajjitāni, aṃja pana yathānuppattamakkhaligosāya vādato paṭṭhāya pucchissāmi, makkhali pana āvuso

Gosālo raññā māgadhenā ajātasattunā vedehiputtena sandiṭṭhikaṃ sāmāññaphalaṃ puṭṭho katham byākāsi.

Vissajjanā – ekamidaṃ bhante samayaṃ rājā māgadho ajātasattu vedehiputto yena makkhaligosālo tenupasaṅkami, upasaṅkamtivā makkhalim gosālam sandiṭṭhikaṃ sāmāññaphalaṃ pucchi, atha kho bhante makkhaligosālo rājānaṃ māgadham ajātasattum vedehiputtam etadavoca “natthi mahārāja hetu natthi paccayo sattānaṃ saṃkilesāya, ahetū apaccayā sattā saṃkilissanti. Natthi mahārāja hetu natthi paccayo sattānaṃ visuddhiyā, ahetū apaccayā sattā visujjhanti, (peyyāla) cullāsīti mahākappino satahassāni, yāni bāle ca paṇḍite ca sandhāvitvā saṃsaritvā dukkhassantaṃ karissanti, tattha natthi ‘imināham sīlena vā vatena vā tapena vā brahmacariyena vā aparipakkaṃ vā kammaṃ paripācessāmi, paripakkaṃ vā kammaṃ phussa phussa byantiṃ karissāmī’ti hevaṃ natthi. Doṇamite sukhadukkhe, pariyaṇtakate saṃsāre natthi hāyanaṇvaḍḍhane, natthi ukkaṃsāvakaṃse. Seyyathāpi nāma suttaṃ puṭṭhe khitte nibbēṭhiyamānameva paleti, evameva bāle ca paṇḍite ca sandhāvitvā saṃsaritvā dukkhassantaṃ karissanti’”ti, itthaṃ kho bhante rañño māgadhasa ajātasattussa vedehiputtassa makkhaligosālo sandiṭṭhikaṃ sāmāññaphalaṃ puṭṭho samāno saṃsārasuddhim byākāsi.

Makkhaligosālavāda

Ayampi āvuso vādo nissirikoyeva anattasaṃhito jigucchanīyo ati viya bhayānako, ye tassa

vacanaṃ sotabbaṃ saddhātabbaṃ maññeyyumaṃ, tesamaṃ taṃ assa dīgharattaṃ ahitāya dukkhāya.

Ajitakesakambalavāda

Pucchā – athāparampi pucchāmi, ajito pana āvuso kesakambalo rañña māgadhenā ajātasattunā vedehiputtana sandiṭṭhikaṃ sāmāññaphalaṃ puṭṭho kathaṃ byākāsi.

Vissajjanā – ekamidaṃ bhante samayaṃ rājā māgadho ajātasattu vedehiputto yena ajito kesakambalo tenupasaṅkami, upasaṅkamitvā ajitaṃ kesakambalaṃ sandiṭṭhikaṃ sāmāññaphalaṃ pucchi, atha kho bhante ajito kesakambalo rājānaṃ māgadhaṃ ajātasattaṃ vedehiputtaṃ etadavoca “natthi mahārāja dinnamaṃ, natthi yiṭṭhamaṃ, natthi hutaṃ, natthi sukatadukkaṭānaṃ kammaṇaṃ phalaṃ vipāko, natthi ayaṃ loko, natthi paro loko, natthi mātā, natthi pitā, natthi sattā opapātikā, natthi loke samaṇabrāhmaṇā sammaggatā sammāpaṭipannā, ye imaṅca lokaṃ paraṅca lokaṃ sayamaṃ abhiñña sacchikatvā pavedenti. (Peyyāla) bāle ca paṇḍite ca kāyassa bheda ucchiṃjanti vinassanti”ti. Itthaṃ kho bhante rañño māgadhasa ajātasattussa vedehiputtassa ajito kesakambalo sandiṭṭhikaṃ sāmāññaphalaṃ puṭṭho samāno ucchedaṃ byākāsi.

Ajitakesakambala

Ayampi kho āvuso nissirikoyeva, anattasaṃhito jigucchaniyo ati viya bhayānako, ye tassa vacanaṃ sotabbaṃ saddhātabbaṃ maññeyyumaṃ, tesamaṃ taṃ assa dīgharattaṃ ahitāya dukkhāya.

Pakudhakaccāyanavāda

Pucchā – athāparampi pucchāmi, pakudho pana āvuso kaccāyano rañña māgadhenā ajātasattunā vedehiputtana sandiṭṭhikaṃ sāmāññaphalaṃ puṭṭho kathaṃ byākāsi.

Vissajjanā – ekamidaṃ bhante samayaṃ rājā māgadho ajātasattu vedehiputto yena pakudho kaccāyano tenupasaṅkami, upasaṅkamitvā pakudhaṃ kaccāyanaṃ sandiṭṭhikaṃ sāmāññaphalaṃ pucchi, atha kho bhante pakudho kaccāyano rājānaṃ māgadhaṃ ajātasattaṃ vedehiputtaṃ etadavoca “sattime mahārāja kāyā akaṭā akaṭavidhā animmitā animmātā vaṅcā kūṭaṭṭhā esikaṭṭhāyitā, te na iñjanti, na vipariṇāmenti, na aññamaññaṃ byābādhenti, nālaṃ aññamaññaṃ sukkhāya vā dukkhāya vā sukhadukkhāya vā. Katame satta, pathavīkāyo, āpokāyo, tejokāyo vāyokāyo, sukhe, dukkhe, jīve sattame. Ime sattakāyā akaṭā akaṭavidhā animmitā animmātā vaṅcyā kūṭaṭṭhā esikaṭṭhāyitā, te na iñjanti, na vipariṇāmenti, na aññamaññaṃ byābādhenti, nālaṃ aññamaññaṃ sukkhāya vā dukkhāya vā sukhadukkhāya vā. Tattha natthi hantā vā ghātetā vā, sotā vā sāvetā vā, viññātā vā viññāpetā vā, yopi tiṇhena satthena sīsaṃ chindati, na koci kiñci jivitā voropeti, sattannaṃtveva kāyānamantarena satthaṃ vivaramanupatati”ti. Itthaṃ kho bhante rañño māgadhasa ajātasattussa vedehiputtassa pakudho kaccāyano sāmāññaphalaṃ puṭṭho samāno aññaṃ byākāsi.

Pakudhakaccāyanavāda

Ayampi kho āvuso vādo purimavādoviya nissirikoyeva anattasaṃhito jigucchaniyo ativiya bhayānako.

Nigaṇṭhanāṭaputtavāda

Pucchā – athāparampi pucchāmi, nigaṇṭho panāvuso nāṭaputto rañña māgadhenā ajātasattunā vedehiputtana sandiṭṭhikaṃ sāmāññaphalaṃ puṭṭho kathaṃ byākāsi.

Vissajjanā – ekamidaṃ bhante samayaṃ rājā māgadho ajātasattu vedehiputto yena nigaṇṭho nāṭaputto tenupasaṅkami, upasaṅkamitvā nigaṇṭhaṃ nāṭaputtaṃ sandiṭṭhikaṃ sāmāññaphalaṃ pucchi, atha kho nigaṇṭho nāṭaputto rājānaṃ māgadhaṃ ajātasattum vedehiputtaṃ etadavoca, “idha mahārāja nigaṇṭho cātuyāmasaṃvarasaṃvuto hoti, kathaṅca mahārāja

Nigaṇṭho cātuyāmasaṃvarasaṃvuto hoti, idha mahārāja nigaṇṭho sabbavārivārīto ca hoti, sabbavāriyutto ca, sabbavāridhuto ca, sabbavāriphuṭo ca. Evaṃ kho mahārāja nigaṇṭho cātuyāmasaṃvarasaṃvuto hoti, yato kho mahārāja nigaṇṭho evaṃ cātuyāmasaṃvarasaṃvuto hoti. Ayaṃ vuccati mahārāja nigaṇṭho gatatto ca yatatto ca ṭhitatto cā’ ti. Itthaṃ kho bhante rañño māgadhassa ajātasattussa vedehiputtassa nigaṇṭho nāṭaputto sandiṭṭhikaṃ sāmāññaphalaṃ puṭṭho samāno cātuyāmasaṃvaram byākāsi.

Nigaṇṭhavāda

Etassa panāvuso vāde koci sāsanānulomavādo atthi, asuddhaladdhitāya pana esopi vādo jigucchaniyoyeva, seyyathāpi bhojanaṃ gūthamissaṃ gārayhoyeva ārakā parivajjitabboyeva, seyyathāpi visasaṃsaṭṭho āpanīyakaṃso.

Siñcaññavāda

Pucchā – athāparampi pucchāmi, sañcayo panāvuso belatṭhaputto sandiṭṭhikaṃ sāmāññaphalaṃ puṭṭho kathaṃ byākāsi.

Vissajjanā – ekamidaṃ bhante samayaṃ rājā māgadho ajātasattu vedehiputto yena sañcayo belatṭhaputto tenupasaṅkami, upasaṅkamitvā sañcayaṃ belatṭhaputtaṃ etadavoca, “yathā nu kho imāni bho sañcaya puthusippāyatanāni, seyyathidaṃ, hatthārohā assarohā...pe... sakkā nu kho bho sañcaya evameva diṭṭheva dhamme sandiṭṭhikaṃ sāmāññaphalaṃ paññapetu’ nti, evaṃ vutte bhante sañcayo belatṭhaputto rājānaṃ māgadhaṃ ajātasattum vedehiputtaṃ etadavoca.

“Atthi parolokoti iti ce maṃ puchasi, atthi paro lokoti iti ce me assa, atthi paro

Lokoti iti te naṃ byākareyyaṃ, evantipi me no, tathātipi me no, aññathātipi me no, notipi me no, no notipi me no...pe... neva hoti na na hoti tathāgato paraṃ maraṇāti iti ce maṃ puchasi, neva hoti na na hoti tathāgato paraṃ maraṇāti iti ce me assa, neva hoti na na hoti tathāgato paraṃ maraṇāti iti te naṃ byākareyyaṃ, evantipi me no, tathātipi me no, aññathātipi me no, notipi me no, no notipi me no’ ti. Itthaṃ kho bhante rañño māgadhassa ajātasattussa vedehiputtassa sañcayo belatṭhaputto sandiṭṭhikaṃ sāmāññaphalaṃ puṭṭho samāno vikkhepaṃ byākāsi.

Titthiyūvāda

Sabbepi āvuso ete channaṃ sathārānaṃ vādā nissirikāyeva jigucchaniyāyeva anattasaṃhitāyeva, bālānaṃ bhiyyoso mattāya sammohāya saṃvattanti anattāya.

Ajja pana āvuso kālo atikkanto, sveyeva bhagavatā vuttaṃ paṇītaṃ pasatṭhaṃ sandiṭṭhikaphalaṃ pucchāma.

Pucchā – purimadivasesu āvuso sāmāññaphalasuttassa pubbabhāge yāva chasatthāramicchāvādapariyosānaṃ pucchānavissajjanaṃ amhehi kataṃ, ajja pana yathānuppattaṃ bhagavatā desitasāmāññaphalasuttādhiḱāre pucchāvissajjanaṃ karissāma. Bhagavā pana āvuso raññā māgadhena ajātasattunā vedehiputtēna sandiṭṭhikaṃ sāmāññaphalaṃ puṭṭho kathaṃ byākāsi.

Vissajjanā – bhagavā bhante tidhā vibhajitvā rañño māgadhasa ajātasattussa vedehiputtassa sandiṭṭhikaṃ sāmaññaphalaṃ puṭṭho byākāsi.

Pucchā – kathañcāvuso bhagavā rañño māgadhasa ajātasattuno vedehiputtassa paṭhamam sandiṭṭhikaṃ sāmaññaphalaṃ desesi.

Vissajjanā – dāsam bhante pabbajitam upamābhāvena niddisivā rañño māgadhasa ajātasattussa vedehiputtassa bhagavā paṭhamam sandiṭṭhikaṃ sāmaññaphalaṃ desesi.

Soham bhante bhagavantampi pucchāmi, yathā nu kho imāni bhante puthusippāyatanāni seyyathidaṃ...pe... sakkā nu kho bhante eva meva diṭṭheva dhamme sandiṭṭhikaṃ sāmaññaphalaṃ paññāpetum –

Acchariyam āvuso abbhutaṃ āvuso, yāva svākhātassa buddhasāsanassa mahiddhikatā mahānubhāvatā, yatrahi nāma dāsopi nihīnajacco evaṃ svākhāte buddhasāsane pabbajitvā attano issarabhūtena raññāpi vandaniyattaṃ garukaraṇiyattaṃ pāpuṇissati, supaññattametam bhagavatā paṭhamam sandiṭṭhikaphalaṃ.

Pucchā – katham panāvuso bhagavā rañño māgadhasa ajātasattuno vedehiputtassa dutiyam sandiṭṭhikaṃ sāmaññaphalaṃ desesi.

Vissajjanā – kassakam bhante pabbajitam upamābhāvena dassetvā bhagavā rañño māgadhasa ajātasattussa vedehiputtassa sandiṭṭhikaṃ sāmaññaphalaṃ desesi.

Acchariyam āvuso abbhutaṃ āvuso, yāva buddhasāsanassa svākhātātā mahiddhikatā mahānubhāvatā, yatrahi nāma kassa kopī guṇarahito evaṃ svākhāte buddhasāsane pabbajitvā raṭṭhadhipatinā manussaloke devabhūtena raññāpi garukaraṇiyattaṃ vandaniyattaṃ pāpuṇissati, supaññattametam āvuso bhagavatā dutiyam sandiṭṭhikaphalaṃ.

Pucchā – kathañcā panāvuso bhagavā purimehi sandiṭṭhikasāmaññaphalehi abhikkantatarañca paṇītatarañca sandiṭṭhikaṃ sāmaññaphalaṃ rañño desesi.

Vissajjanā – bhagavā bhante buddhuppādato paṭṭhāya kulaputtassa pabbajita bhāvaṃ, tassa ca sīlasampadam, tassa ca indriyesu guttadvāratam, ariyañcasatisampajaññam, ariyañca santuṭṭhim, pañcannañca nīvaraṇānam pahānam, cattāri ca jhānāni, aṭṭha ca vijjāyo, tāhi tāhi upamāhi vitthārato vibhajitvā rañño māgadhasa ajātasattussa vedehiputtassa sandiṭṭhikaṃ sāmaññaphalaṃ purimehi sandiṭṭhikehi sāmaññaphalehi abhikkantatarañca paṇītatarañca desesi.

Sakkā pana bhante diṭṭheva dhamme sandiṭṭhikaṃ sāmaññaphalaṃ, purimehi sandiṭṭhikehi sāmaññaphalehi abhikkantatarañca paṇītatarañca paññāpetum.

Sakkā mahārājā, tena hi mahārāja suṇohi sādhuṃ manasikarohi bhāsissāmi.

Pucchā – kathañca panāvuso bhikkhu sīlasampanno hoti, kathañca bhagavā rañño māgadhasa ajātasattuno vedehiputtassa cūlasīlam vibhajitvā desesi.

Vissajjanā – “kathañca mahārāja bhikkhu sīlasampanno hoti. Idha mahārāja bhikkhu paṇātipātā pahāya paṇātipātā paṭivirato hoti nihitadaṇḍo nihitasattho lajjī dayāpanno, sabbapāṇabhūtahitānukampī viharati. Idampissa hoti sīlasmiṃ” evamādinā bhante bhagavā rañño māgadhasa ajātasattussa vedehiputtassa chabbāsatiyā ākārehi cūlasīlam vibhajitvā desesi.

Sādhu sādhu āvuso, sādhu sādhu āvuso yaṃ bhikkhu evaṃ svākhāte buddhasāsane saddhāpabbajito iminā ca cūlasīlena samannāgato vihareyya.

Idāni pana kālo atikkanto.

Suve yathānuppattaṭṭhānato paṭṭhāya pucchāvissajjanaṃ karissāma.

Pucchā – kathaṃ panāvuso rañño māgadhasa ajātasattuno vedehiputtassa majjhimasīlaṅca mahāsīlaṅca vibhajitvā desesi.

Vissajjanā – ‘‘yathā vā paneke bhonto samaṇabrāhmaṇā saddhādeyyāni bhojanāni bhuñjitvā te evarūpaṃ bījagāmahūtagāmasamārambhaṃ anuyuttā viharanti. Seyyathidaṃ. Mūlabījaṃ khandhabījaṃ phalubījaṃ aggabījaṃ bījabījameva pañcamaṃ, iti evarūpā bījagāmahūtagāmasamārambhā paṭivirato hoti. Idampissa hoti sīlasmiṃ’’ evamādinā bhante bhagavā rañño māgadhasa ajātasattussa vedehiputtassa majjhimasīlaṅca mahāsīlaṅca vitthārato vibhajitvā desesi.

Sādhu sādhu āvuso, sādhu kho āvuso yaṃ bhikkhu evaṃ svākhāte buddhasāsane saddhāpabbajito evaṃ ariyena sīlena samannāgato vihareyya.

Pucchā – kathaṃ panāvuso ariyaṃ indriyaṃvaraṅca ariyaṃ satisampajaññaṅca ariyaṃ santosaṅca bhagavā rañño māgadhasa ajātasattussa vibhajitvā desesi.

Vissajjanā – idha mahārāja bhikkhu cakkhunā rūpaṃ disvā na nimittaggāhī hoti nanubyañjanaggāhī, yatvādhikaraṇameṇaṃ cakkhundriyaṃ asaṃvutaṃ viharantaṃ abhijjhādomanassā pāpakā akusalā dhammā anvāssaveyyuṃ, tassa saṃvarāya paṭipajjati, rakkhati cakkhundriyaṃ, cakkhundriye saṃvaram āpajjati, evamādinā ca.

Idha mahārāja bhikkhu satisampajaññaṅca samannāgato hoti, abhikkante paṭikkante sampajānakārī hoti,

Ālokite vilokite sampajānakārī hoti, samiñjite pasārite sampajānakārī hoti, saṅghāṭipattacīvaradhāraṇe sampajānakārī hoti, asīte pīte khāyite sāyite sampajānakārī hoti, uccārapassāvakamme sampajānakārī hoti, gate ṭhite nisinne sutte jāgarite bhāsīte tuṅhībhāve sampajānakārī hoti, evaṃ kho mahārāja bhikkhu satisampajaññaṅca samannāgato hoti.

Kathaṅca mahārāja bhikkhu santuṭṭho hoti, idha mahārāja bhikkhu santuṭṭho hoti kāyaparihārikena cīvarena kucchiparihārikena piṇḍapātena.

Evamādinā bhante bhagavā rañño māgadhasa ajātasattussa vedehiputtassa ariyaṅca indriyesuguttadvārataṃ ariyaṅca satisampajaññaṃ ariyaṅca santosaṃ vibhajitvā desesi.

Sādhu sādhu āvuso, sādhu kho āvuso yaṃ bhikkhu evaṃ svākhāte buddhasāsane saddhāpabbajito iminā ca ariyena indriyaṃvarena samannāgato, iminā ca ariyena satisampajaññaṅca

Samannāgato, imāya ca ariyāya santuṭṭhiyā samannāgato vihareyya.

Pucchā – kathaṃ panāvuso bhagavā rañño māgadhasa ajātasattussa vedehiputtassa nīvaraṇapahānaṃ vibhajitvā desesi.

Vissajjanā – so evaṃ ariyena sīlakkhandhena samannāgato, ariyena indriyasamvarena samannāgato, ariyena satisampajaññaena samannāgato, ariyāya santuṭṭhiyā samannāgato, vivittaṃ senāsanam bhajati araññaṃ rukkhamaṃ pabbataṃ kandaraṃ giriguhaṃ susānaṃ vanapattaṃ abbhokāsaṃ palālapuññaṃ. So pacchābhataṃ piṇḍapātaṭṭhikkanto nisīdati pallaṅkaṃ ābhūñjitvā ujum kāyaṃ pañidhāya parimukhaṃ satim upaṭṭhapetvā. So abhijjhaṃ loke pahāya vigatābhijjhena cetasā viharati...pe... tassime pañca nīvaraṇe pahīne attani samanupassato pāmojjaṃ jāyati, pamuditassa pīti jāyati, pītimanassa kāyo passambhati, passaddhakāyo sukhaṃ vedehi, sukhino cittaṃ samādhiyati. Evaṃ kho bhante bhagavā rañño māgadhasa ajātasattussa vedehiputtassa nīvaraṇappahānaṃ vibhajitvā vitthārato desesi.

Sādhu sādhu āvuso, sādhu kho āvuso yaṃ bhikkhu evaṃ svākhāte buddhasāsane saddhāpabbajito evaṃ pañcanīvaraṇe pajahitvā tehi cittaṃ visodhetvā vihareyya.

Pucchā – kathañcāvuso bhagavā rañño māgadhasa ajātasattussa vedehiputtassa paṭhamam sandiṭṭhikaṃ sāmāññaphalaṃ desesi, purimehi sandiṭṭhikehi sāmāññaphalehi abhikkantatarañca pañītataarañca.

Vissajjanā – so vivicceva kāmehi vivicca akusalehi dhammehi savitakkaṃ savicāraṃ vivekajaṃ pītisukhaṃ paṭhamam jhānaṃ upasampajja viharati...pe... idampi kho mahārāja sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantatarañca

Pañītataarañca. Evaṃ kho bhante bhagavā rañño māgadhasa ajātasattussa vedehiputtassa paṭhamam sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantatarañca pañītataarañca desesi.

Sādhu sādhu āvuso, sādhu kho āvuso yaṃ bhikkhu evaṃ svākhāte buddhasāsanasañkhāte dhammavinaye pabbajitvā evaṃ paṭhamam jhānaṃ

Upasampajja vivekajena pītisukhena attano kāyaṃ abhisandeyya parisandeyya paripūreyya.

Pucchā – kathañcāvuso bhagavā dutiyañca tatiyañca catutthañca sandiṭṭhikaṃ sāmāññaphalaṃ desesi, purimehi sandiṭṭhikehi sāmāññaphalehi abhikkantatarañca pañītataarañca.

Vissajjanā – puna ca paraṃ mahārāja bhikkhu vitakkavicārānaṃ vūpasamā ajjhataṃ sampasādanaṃ cetaso ekodibhāvaṃ avitakkaṃ avicāraṃ samādhijaṃ pītisukhaṃ dutiyaṃ jhānaṃ upasampajja viharati evamādinā bhante bhagavā rañño māgadhasa ajātasattussa vedehiputtassa dutiyañca tatiyañca catutthañca sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantatarañca pañītataarañca desesi.

Sādhu sādhu āvuso, sādhu kho āvuso yaṃ bhikkhu evaṃ svākhāte buddhasāsanasañkhāte dhammavinaye saddhāpabbajito evaṃ dutiyajhānañca tatiyajhānañca catutthajhānañca upasampajja tehi jhānasukhehi attano kāyaṃ abhisandetvā parisandetvā paripūretvā vihareyya.

Pucchā – kathañca pañāvuso bhagavā rañño māgadhasa ajātasattussa vedehiputtassa aparampi sandiṭṭhikaṃ sāmāññaphalaṃ desesi, purimehi sandiṭṭhikehi sāmāññaphalehi abhikkantatarañca pañītataarañca.

Vissajjanā – so evaṃ samāhite citte parisuddhe pariyodāte anaṅgaṇe vigatūpakkilese mudubhūte kammaniye ṭhite ānañjappatte nīṇadassanāya cittaṃ abhinīharati abhininnāmeti, so evaṃ pajānāti “ayaṃ kho me kāyo rūpī cātumahābhūṭiko mātāpettikasambhavo odanakummāsūpacayo aniccucchādanaparimaddanabhedanavidhamsanadhammo, idañca pana me viññāṇaṃ ettha sitaṃ ettha

paṭibandhanti...pe... idampi kho mahārāja sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantataraṇca paṇītataraṇca. Evaṃ kho bhante bhagavā rañño māgadhasa ajātasattussa vedehiputtassa aparampi sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantataraṇca paṇītataraṇca desesi.

Suññāraṃgā pavitṭhassa, santacittassa bhikkhuno. Amānusī ratī hoti, sammādhammaṃ vipassato.

Sādhu sādhu āvuso, sādhu kho āvuso yaṃ bhikkhu evaṃ svākhāte buddhasāsanasaṅkhāte dhammavinaye saddhāpabbajito evaṃ ñānadassanaṃ uppādetvā evaṃ ñānadassanaena samannāgato hutvā vihareyya.

Pucchā – kathaṅcāvuso bhagavā aparampi sandiṭṭhikaṃ sāmāññaphalaṃ desesi, purimehi sandiṭṭhikehi sāmāññaphalehi abhikkantataraṇca paṇītataraṇca.

Vissajjanā – so evaṃ samāhite citte parisuddhe pariyodāte anaṅgaṇe vigatūpakkilese mudubhūte kammaniye ṭhite ānañjappatte manomayaṃ kāyaṃ abhinimmānāya cittaṃ abhinīharati abhininnāmeti, so imamhā kāyā aññaṃ kāyaṃ abhinimmināti rūpiṃ manomayaṃ sabbaṅgapaccaṅgiṃ ahīndriyaṃ evamādinā bhante bhagavā rañño māgadhasa ajātasattussa vedehiputtassa aparampi sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantataraṇca paṇītataraṇca desesi.

Sādhu sādhu āvuso, sādhu kho āvuso yaṃ bhikkhu evaṃ svākhāte buddhasāsanasaṅkhāte dhammavinaye saddhāpabbajito evaṃ visesena manomayaññānaena samannāgato vihareyya.

Pucchā – bhagavā āvuso rañño māgadhasa ajātasattussa vedehiputtassa jhānacatukkasāṅkhātāṇca paṭhama dutiya vijjāsāṅkhātāṇca sandiṭṭhikaṃ sāmāññaphalaṃ dassetvā, aparāṃ kīdisaṃ saṃndiṭṭhikaṃ sāmāññaphalaṃ desesi, purimehi sandiṭṭhikehi sāmāññaphalehi abhikkantataraṇca paṇītataraṇca.

Vissajjanā – so evaṃ samāhite citte parisuddhe pariyodāte anaṅgaṇe vigatūpakkilese mudubhūte kammaniye ṭhite ānañjappatte iddhividhāya cittaṃ abhinīharati abhininnāmeti, so anekavihitaṃ iddhividhaṃ paccanubhoti, ekopi hutvā bahudhā hoti, bahudhāpi hutvā eko hoti...pe... idampi kho mahārāja sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantataraṇca paṇītataraṇcāti. Itthaṃ kho bhante bhagavā rañño māgadhasa ajātasattussa vedehiputtassa aparampi sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantataraṇca paṇītataraṇca desesi.

Acchariyaṃ āvuso abbhutaṃ āvuso, yāva buddhasāsanassa svākhātātā, yatrahi nāma evaṃ svākhāte buddhasāsane pabbajitvā sāvakopi sammāpaṭipanno evaṃ mahiddhikaṃ evaṃ mahānubhāvaṃ iddhividhaññānampi paccanubhossati.

Pucchā – kathaṃ panāvuso bhagavā aparampi sandiṭṭhikaṃ sāmāññaphalaṃ desesi, purimehi sandiṭṭhikehi sāmāññaphalehi abhikkantataraṇca paṇītataraṇca.

Vissajjanā – so evaṃ samāhite citte parisuddhe pariyodāte anaṅgaṇe vigatūpakkilese mudubhūte kammaniye ṭhite ānañjappatte dibbāya sotadhātuyā cittaṃ abhinīharati abhininnāmeti, so dibbāya sotadhātuyā visuddhāya atikkanta mānuskāya ubho sadde suṇāti dibbe ca mānuse ca ye dūre santike ca...pe... idampi kho mahārāja sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantataraṇca paṇītataraṇca. Evaṃ kho bhante bhagavā rañño māgadhasa ajātasattussa vedehiputtassa aparampi sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantataraṇca paṇītataraṇca desesi.

Acchariyaṃ āvuso, abbhutaṃ āvuso, yāva buddhasāsanassa svākhātātā, yatrahi nāma evaṃ

svākhāte buddhasāsane saddhāpabbajito sammāpaṭipanno sāvakopi evaṃ visesaṃ dibbasotaññaṃ paṭilabhissati.

Pucchā – kathaṃ panāvuso bhagavā aparampi sandiṭṭhikaṃ sāmaññaphalaṃ desesi, purimehi sandiṭṭhikehi sāmaññaphalehi abhikkantataraṇca paṇītaraṇca.

Vissajjanā – so evaṃ samāhite citte parisuddhe pariyodāte. Anaṅgaṇe vigatūpakkilese mudubhūte kammaniye ṭhite

Ānañjappatte cetopariyaññāya cittaṃ abhinīharati abhininnāmeti, so parasattānaṃ parapuggalānaṃ cetasā ceto paricca pajānāti, sarāgaṃ vā cittaṃ sarāgaṃ cittanti pajānāti, vītarāgaṃ vā cittaṃ vītarāgaṃ cittanti pajānāti...pe... idampi kho mahārāja sandiṭṭhikaṃ sāmaññaphalaṃ purimehi sandiṭṭhikehi sāmaññaphalehi abhikkantataraṇca paṇītaraṇca. Evaṃ kho bhante bhagavā rañño māgadhasa ajātasattussa vedehiputtassa aparampi sandiṭṭhikaṃ sāmaññaphalaṃ purimehi sandiṭṭhikehi sāmaññaphalehi abhikkantataraṇca paṇītaraṇca desesi.

Acchariyaṃ āvuso, abbhutaṃ āvuso, yāva buddhasāsanassa svākhātātā, yatrahi nāma evaṃ svākhāte buddhasāsane pabbajito sammāpaṭipanno sāvakopi evaṃ visesaṃ cetopariyaññaṃ paṭilabhissati.

Pucchā – kathaṃ panāvuso bhagavā aparampi sandiṭṭhikaṃ sāmaññaphalaṃ desesi, purimehi sandiṭṭhikehi sāmaññaphalehi abhikkantataraṇca paṇītaraṇca.

Vissajjanā – so evaṃ samāhite citte parisuddhe pariyodāte anaṅgaṇe vigatūpakkilese mudubhūte kammaniye ṭhite ānañjappatte pubbenivāsānussatiññāya cittaṃ abhinīharati abhininnāmeti, so anekavihitānaṃ pubbenivāsaṃ anussarati, seyyathidaṃ, ekampi jātīnaṃ dvepi jātiyo...pe... idampi kho mahārāja sandiṭṭhikaṃ sāmaññaphalaṃ purimehi sandiṭṭhikehi sāmaññaphalehi abhikkantataraṇca paṇītaraṇca. Evaṃ kho bhante bhagavā rañño māgadhasa ajātasattussa vedehiputtassa aparampi sandiṭṭhikaṃ sāmaññaphalaṃ purimehi sandiṭṭhikehi sāmaññaphalehi abhikkantataraṇca paṇītaraṇca desesi.

Acchariyaṃ āvuso, abbhutaṃ āvuso, yāva buddhasāsanassa svākhātātā, yatrahi nāma evaṃ svākhāte buddhasāsane pabbajitvā sāvakopi sammāpaṭipanno evaṃ visesaṃ pubbenivāsaññaṃ paṭilabhissati.

Pucchā – kathaṇca panāvuso bhagavā sandiṭṭhikaṃ sāmaññaphalaṃ desesi, purimehi sandiṭṭhikehi sāmaññaphalehi abhikkantataraṇca paṇītaraṇca.

Vissajjanā – so evaṃ samāhite citte parisuddhe pariyodāte anaṅgaṇe vigatūpakkilese mudubhūte kammaniye ṭhite āneñjappatte sattānaṃ cutūpapātaññāya cittaṃ abhinīharati abhininnāmeti, so dibbena cakkhunā visuddhena atikkantamānusakena satte passati cavamāne upapajjamāne hīne paṇīte suvaṇṇe dubbaṇṇe sugate duggate yathākammupage satte pajānāti...pe... idampi kho mahārāja sandiṭṭhikaṃ sāmaññaphalaṃ purimehi sandiṭṭhikehi sāmaññaphalehi abhikkantataraṇca paṇītaraṇca. Itthaṃ kho bhante bhagavā rañño māgadhasa ajātasattussa vedehiputtassa aparampi sandiṭṭhikaṃ sāmaññaphalaṃ purimehi sandiṭṭhikehi sāmaññaphalehi abhikkantataraṇca paṇītaraṇca desesi.

Acchariyaṃ āvuso, abbhutaṃ āvuso, yāva buddhasāsanassa svākhātātā, yatrahi nāma evaṃ svākhāte buddhasāsane pabbajito sāvakopi sammāpaṭipanno evaṃ visesaṃ dibbacakkhuññaṃ paṭilabhissati.

Pucchā – kathaṃ panāvuso bhagavā priyosāne uttaritaraṃ sāmaññaphalaṃ desesi.

Vissajjanā – so evaṃ samāhite citte parisuddhe pariyodāte anaṅgaṇe vigatūpakkilese mudubhūte kammaniye t̥hite āneñjappatte āsavānaṃ khayañāṇāya cittaṃ abhinīharati abhininnāmeti...pe... idaṃ kho mahārāja sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantatarañca paṇītatarañca. Imasmā ca pana mahārāja sandiṭṭhikā sāmāññaphalā aññaṃ sandiṭṭhikaṃ sāmāññaphalaṃ uttaritaraṃ vā paṇītaraṃ vā natthīti. Itthaṃ kho bhante bhagavā rañño māgadhasa ajātasattussa vedehiputtassa pariyosānaṃ sandiṭṭhikaṃ sāmāññaphalaṃ purimehi sandiṭṭhikehi sāmāññaphalehi abhikkantatarañca paṇītatarañca desesi.

Sādhu sādhu āvuso, sādhu kho āvuso, yaṃ bhikkhu buddhasāsane saddhāpabbajito evaṃ svākhāte dhammavinaye sammāpaṭipanno āsavakkhayaññaṃ pāpuṇitvā dukkhassantaṃ karoti.

Pucchā – kathaṃ panāvuso rājā māgadho ajātasattu vedehiputto imissā desanāya pariyosāne bhagavati ca desanāyañca pasanno pasannākāraṃ akāsi, kīdisañca ānisaṃsaṃ paṭilabhi.

Vissajjanā – evaṃ vutte bhante māgadho ajātasattu vedehiputto bhagavantaṃ etadavoca, abhikkantaṃ bhante, abhikkantaṃ bhante, seyyathāpi bhante nikkujjitaṃ vā ukkujjeyya, paṭicchannaṃ vā vivareyya...pe... ajjatagge pañṇupetaṃ saraṇaṃ gatanti, ayañhi bhante rājā pitumāritakālatō paṭṭhāya neva rattiṃ na divā niddaṃ paṭilabhati, satthāraṃ pana upasaṅkamtivā imāya madhurāya ojavantiyā dhammadesanāya sutakālatō paṭṭhāya niddaṃ paṭilabhati, tiṇṇaṃ ratanānaṃ mahāsakkāramakāsi, puthujjanikāya saddhāya samannāgato nāma iminā rañña sadiso nāhosi, anāgate pana vijitāvī nāma paccekabuddho hutvā parinibbāyissati. Evaṃ kho bhante rājā māgadho ajātasattu vedehiputto desanāpariyosāne pasanno pasannākāramakāsi, idisañca bhante mahānisaṃsaṃ paṭilabhi.

Ambaṭṭhasutta

Pucchā – tenāvuso bhagavā jānatā arahatā passatā sammāsambuddhena ambaṭṭhaṃ t̥ama suttaṃ kattha kaṃ ārabba bhāsitaṃ.

Vissajjanā – kosalesu bhante janapade icchānaṅgale nāma kosalānaṃ brāhmaṇagāme ambaṭṭhaṃ nāma māṇavaṃ brāhmaṇassa pokkharasātissa antevāsīṃ ārabba bhāsitaṃ.

Soṇadaṇḍasutta

Pucchā – soṇadaṇḍaṃ panāvuso suttaṃ bhagavatā kattha kaṃ ārabba bhāsitaṃ.

Vissajjanā – aṅgesu bhante janapade campāyaṃ soṇadaṇḍaṃ brāhmaṇaṃ ārabba bhāsitaṃ.

Kūṭadantasutta

Pucchā – kūṭadantaṃ panāvuso suttaṃ bhagavatā kattha kaṃ ārabba bhāsitaṃ.

Vissajjanā – magadhesu bhante khāṇumate nāma brāhmaṇagāme kūṭadanta brāhmaṇaṃ ārabba bhāsitaṃ.

Mahālisutta

Pucchā – mahāliṃ panāvuso suttaṃ bhagavatā kattha kaṃ ārabba bhāsitaṃ.

Vissajjanā – vesāliyaṃ bhante oṭṭhaddhaṃ nāma licchaviṃ ārabba bhāsitaṃ.

Jāliyasutta

Pucchā – jāliyaṃ paṇāvuso suttaṃ bhagavatā kattha kaṃ ārabha bhāsitaṃ.

Vissajjanā – kosambiyaṃ bhante dve pabbajite ārabha bhāsitaṃ.

Mahāsīhanādasutta

Pucchā – mahāsīhanādaṃ paṇāvuso suttaṃ bhagavatā kattha kaṃ ārabha bhāsitaṃ.

Vissajjanā – uruññāyaṃ bhante kaṇṇakathale acelaṃ kassapaṃ ārabha bhāsitaṃ.

Poṭṭhapādasutta

Pucchā – poṭṭhapādaṃ paṇāvuso suttaṃ bhagavatā kattha kaṃ ārabha bhāsitaṃ.

Vissajjanā – sāvatthiyaṃ bhante poṭṭhapādañca paribbājakaṃ cittañca hatthisāriputtaṃ ārabha bhāsitaṃ.

Subhasutta

Pucchā – subhasuttaṃ paṇāvuso kattha kaṃ ārabha kena bhāsitaṃ.

Vissajjanā – sāvatthiyaṃ bhante āyasmataṃ ānandena dhammabhaṇḍāgārikena subhaṃ māṇavaṃ todeyyaputtaṃ ārabha bhāsitaṃ.

Kevaṭṭasutta

Pucchā – kevaṭṭaṃ paṇāvuso suttaṃ bhagavatā kattha kaṃ ārabha bhāsitaṃ.

Vissajjanā – nāḷandā yaṃ bhante kevaṭṭaṃ gahapatiputtaṃ ārabha bhāsitaṃ.

Lohiccasutta

Pucchā – lohiccasutta paṇāvuso bhagavatā kattha kaṃ ārabha bhāsitaṃ.

Vissajjanā – kosalesu bhante janapade sālavatikāyaṃ lohiccaṃ brāhmaṇaṃ ārabha bhāsitaṃ.

Tevijjasutta

Pucchā – tevijjasuttaṃ paṇāvuso bhagavatā kattha kaṃ ārabha bhāsitaṃ.

Vissajjanā – kosalesu bhante manasākaṭṭhe nāma kosalānaṃ brāhmaṇagāme vāsetṭhaṃ bhāradvājaṃ māṇavaṃ ārabha bhāsitaṃ.

Mahāpadānasutta

Pucchā – tena āvuso bhagavatā jānatā passatā arahatā sammāsambuddhena mahāpadānasuttaṃ dīghanikāye mahāvagge porāṇakehi saṅgitikārehi paṭhamaṃ saṅgitaṃ bhagavatā kattha kaṃ ārabha kismiṃ vatthusmiṃ bhāsitaṃ.

Vissajjanā – sāvattھیyaṃ bhante sambahule bhikkhū ārabba bhāsitaṃ, sambahulānaṃ bhante bhikkhūnaṃ pacchābhattaṃ piṇḍapātaṭṭikkantānaṃ maṇḍalamāle sannisinnānaṃ sannipatitānaṃ pubbenivāsapaṭisaṃyuttā dhammīkathā udapādi, itipi pubbenivāso itipi pubbenivāsoti, tasmīṃ bhante vatthusmīṃ bhāsitaṃ.

Mahānidānasutta

Pucchā – mahānidānasuttaṃ paṇāvuso bhagavatā kattha kaṃ ārabba kismiṃ vatthusmīṃ bhāsitaṃ.

Vissajjanā – kurūsu bhante kammāsadhamme nāma kurūnaṃ nigame āyasmantaṃ ānandaṃ ārabba bhāsitaṃ, āyasmā bhante ānando bhagavantaṃ upasaṅkamtivā etadavoca “acchariyaṃ bhante, abbhutaṃ bhante, yāva gambhīrocāyaṃ bhante paṭiccasamuppādo

Gambhīrāvabhāso ca, atha ca pana me uttānakuttānako viya khāyatī’ ti, tasmīṃ bhante vatthusmīṃ bhāsitaṃ.

Mahāparinibbānasutta

Pucchā – mahāparinibbānasuttaṃ paṇāvuso bahuanusandhikaṃ, bahudesanā saṅghaṃ, buddhassa bhagavato parinibbānāsannavasse pavattaatṭhuppattidīpakavacanapabandhabhūtaṃ, tasmā taṃ antarābhedavasena vibhajja paricchijja paricchijja pucchissāmi, tatthāvuso bhagavatā paṭhamam

Rājūnaṃ aparihāniyadhammadesanā kattha kaṃ ārabba kismiṃ vatthusmīṃ bhāsitaṃ.

Vissajjanā – rājagahe bhante vassakāraṃ brāhmaṇaṃ magadhamahāmattaṃ ārabba bhāsitaṃ, vassakāro bhante brāhmaṇo magadhamahāmatto bhagavantaṃ upasaṅkamtivā etadavoca “rājā bho gotama māgadho ajātasattu vedehiputto vajjī abhiyātukāmo so evamāha ahaṃ hime vajjī evaṃ mahiddhike evaṃ mahānubhāve ucchecchāmi vajjī vināsessāmi vajjī anayabyasanaṃ āpādessāmi vajjī’ ti tasmīṃ bhante vatthusmīṃ bhāsitaṃ.

Pucchā – bhikkhūnaṃ paṇāvuso aparihāniyadhammadesanā bhagavatā kattha kismiṃ vatthusmīṃ bhāsitaṃ.

Vissajjanā – tasmīṃyeva bhante rājagahe tasmīṃyeva vatthusmīṃ bhāsitaṃ.

Jarāsutta

Pucchā – dhammādāso āvuso dhammapariyāyo bhagavatā kattha kaṃ ārabba kismiṃ vatthusmīṃ bhāsitaṃ.

Vissajjanā – nātike bhante giṇjakāvasathe āyasmantaṃ ānanda ārabba bhāsitaṃ, āyasmā bhante ānando bhagavantaṃ upasaṅkamtivā nātikiyānaṃ dvādasannaṃ puggalānaṃ gatiabhisamparāyaṃ pucchi, tasmīṃ bhante vatthusmīṃ bhāsitaṃ.

Attadīpa dhammadesanā

Pucchā – attadīpadhammadesanā paṇāvuso bhagavatā kattha kaṃ ārabba kismiṃ vatthusmīṃ bhāsitaṃ.

Vissajjanā – vesāliyaṃ bhante veḷuvagāmake āyasmantaṃ ānandaṃ ārabba bhāsītā, āyasmā bhante ānando bhagavato gilānavuṭṭhitassa aciravuṭṭhitassa gelaññā bhagavato gelaññena attano khedapattakāraṇaṃ ārocesi, tasmim̃ bhante vatthusmiṃ bhāsītā.

“Tasmātihānanda attadīpā viharatha attasaraṇā anaññasaraṇā”.

Pucchā – bhagavatā āvuso purima dutiyadivase pucchitavissajjitakkamena attadīpadhammadesanañca aññāni ca dhammadesanāni kathetvā pariniṭṭhita sabbabuddhakiccena āyusañkhāro kattha ossaṭṭho.

Vissajjanā – vesāliyaṃ bhante cāpāle cetiye mārena pāpimatā yācito bhagavā satena sampajānena āyusañkhāro ossaṭṭho.

“Parinibbātu dāni bhante bhagavā, parinibbātu sugato, parinibbāna kālo dāni bhante bhagavato.

Apposukko tvaṃ pāpima hoti, na ciraṃ tathāgatassa parinibbānaṃ bhavissati, ito tiṇṇaṃ māsānaṃ accayena tathāgato parinibbāyissati.

Catumahāpadesa

Pucchā – catumahāpadesadhammadesanā panāvuso bhagavatā kattha bhāsītā.

Vissajjanā – bhoganagare bhante ānande cetiye bhāsītā.

Paripakko vayo mayhaṃ, parittaṃ mama jīvitaṃ. Pahāya vo gamissāmi, kataṃ me saraṇamattano.

Samvega

Pucchā – catusamvejanīyakathā panāvuso bhagavatā kattha kaṃ ārabba kismiṃ vatthusmiṃ bhāsītā.

Vissajjanā – kusiṇārāyaṃ bhante āyasmantaṃ ānandaṃ ārabba bhāsītā, āyasmā bhante ānando bhagavantaṃ etadavoca “pubbe bhante disāsu vassaṃvuṭṭhā bhikkhū āgacchanti tathāgataṃ dassanāya, te mayaṃ labhāma manobhāvanīye bhikkhū dassanāya, labhāma payirupāsānāya. Bhagavato pana mayaṃ bhante accayena na labhissāma manobhāvanīye bhikkhū dassanāya, na labhissāma payirupāsānāya”’ti, tasmim̃ bhante vatthusmiṃ bhāsītā.

Yehi keci ānanda cetiyacārikaṃ āhiṇḍantā pasannacittā kālaṃ karissanti, sabbete kāyassa bhedaṃ paraṃ maraṇā sugatiṃ saggamaṃ lokaṃ upapajjissanti hu –

Pucchā – kathañcāvuso bhagavā bhikkhūnaṃ mātugāmesu paṭipajjitabbavattaṃ kathesi.

Vissajjanā – adassanaṃ ānandāti ca anālāpo ānandāti ca satī ānanda upaṭṭhabetabbāti ca evaṃ kho bhante bhagavā mātugāmesu paṭipajjitabbākāraṃ kathesi.

Mahāsudassanasutta

Pucchā – mahāsudassanasuttaṃ panāvuso bhagavatā kattha kaṃ ārabba kismiṃ vatthusmiṃ bhāsitaṃ.

Vissajjanā – tissaṃyeva bhante kusinārāyaṃ āyasmantaṃ ānandaṃ ārabba bhāsitaṃ, āyasmā bhante ānando bhagavantaṃ etadavoca “mā bhante bhagavā imasmiṃ khuddakanagaraḥke

Ujjaṅgalanagaraḥke sākhanagaraḥke parinibbāyi. Santi bhante aññāni mahānagarāni. Seyyathidaṃ, campā, rājagahaṃ, sāvattihī, sāketāṃ, kosambī, bārāṇasī, ettha bhagavā parinibbāyatu, ettha bahū khattiyamahāsālā brāhmaṇa mahāsālā gahapati mahāsālā tathāgate abhippasannā. Te tathāgatassa sarīrapūjaṃ karissanti”ti, tasmīṃ bhante vatthusmiṃ bhāsitaṃ.

Pucchā – bhagavā āvuso purimadivase pucchita vissajjitakkamena mahāsudassana suttantaṃ desetvā subhaddaṃnāma paribbājakaṃ buddhaveneyyesu pacchimasāvakaḥhūtaṃ kathaṃ vinesi.

Vissajjanā – yasmiṃ kho subhadda dhammavinaye ariyo aṭṭhaṅgiko maggo na upalabbhati, samaṇopi tattha na upalabbhati, dutiyopi tattha samaṇo na upalabbhati, tatiyopi tattha samaṇo na upalabbhati, catutthopi tattha samaṇo na upalabbhati (peyyāla). Ime ca subhadda bhikkhū sammā vihareyyuṃ, asuñño loko arahantehi assa, evaṃ kho bhante bhagavā subhaddaṃ paribbājakaṃ buddhaveneyyesu pacchimaṃ sakkhisāvakaṃ vinesi.

Parinibbānasutta

Pucchā – pacchime panāvuso kāle bhagavā āyasmato ānandassa kīdisaṃ vacanaṃ kathetvā, kathaṅca bhikkhū pavāretvā, kīdisaṅca bhikkhūnaṃ vacanaṃ āmantetvā, kathaṅca anupādisesāya nibbānadhātuyā parinibbāyi.

Vissajjanā – bhagavā bhante pacchime kāle āyasmato ānandassa siyā kho panānanda tumhākaṃ evamassa atītasatthukaṃ pāvacanaṃ natthi no satthāti evamādikaṃ vacanaṃ kathetvā, siyā kho pana bhikkhave ekabhikkhussāpi kaṅkhā vā vimati vā buddhe vā dhamme vā saṅghe vā magge vā paṭipadāya vāti evamādinā bhikkhū pavāretvā, handadāni bhikkhave āmantayāmi vo, vayadhammā saṅkhārā appamādena sampādetthāti pacchimaṅca ovādavacanaṃ bhikkhūnaṃ āmantetvā, nava anupubbasaṃpattiyo anulomaṃ paṭilomaṃ samāpajjitvā, catutthajjhānā vuṭṭhahitvā samanantarā anupādisesāya nibbānadhātuyā parinibbāyi.

Nāvuso ānanda bhagavā parinibbuto, saññāvedayita nirodhaṃ samāpanno.

Janavasabhasutta

Pucchā – mahāsudassanasuttaṃ panāvuso purimadivase pucchitaṅca vissajjitaṅca, janavasabhasuttaṃ panāvuso bhagavatā kattha kaṃ ārabba kismiṃ vatthusmiṃ bhāsitaṃ.

Vissajjanā – nātike bhante giṅjakāvasathe āyasmantaṃ ānandaṃ ārabba bhāsitaṃ, āyasmā bhante ānando māgadhaḥke paricāraḥke ārabba bhagavato sammukhā parikathaṃ kathesi, tasmīṃ bhante vatthusmiṃ bhāsitaṃ.

Mahāgovindasutta

Pucchā – mahāgovindasuttaṃ panāvuso bhagavatā kattha bhāsitaṃ.

Vissajjanā – rājagaḥke bhante bhāsitaṃ.

Mahāsamayasutta

Pucchā – mahāsamayasuttaṃ panāvuso bhagavatā kattha bhāsitaṃ.

Vissajjanā – sakkesu bhante kapilavatthusmiṃ bhāsitaṃ.

Sakkapañhasutta

Pucchā – sakkapañhasuttaṃ panāvuso bhagavatā kattha kaṃ ārabha kismiṃ vatthusmiṃ bhāsitaṃ.

Vissajjanā – magadhesu bhante pācīnato rājagahassa ambaṣaṇḍā nāma brāhmaṇagāmo, tassuttarato vediyake pabbate indasālaguhāyaṃ sakkaṃ devānamindaṃ ārabha bhāsitaṃ, sakko bhante devānamindo bhagavantam upasaṅkamitvā pañhaṃ pucchi, tasmim bhante vatthusmiṃ bhāsitaṃ.

Mahāsatipatṭhānasutta

Pucchā – mahāsatipatṭhānasuttaṃ panāvuso bhagavatā kattha bhāsitaṃ.

Vissajjanā – kurūsu bhante kammāsadhamme nāma kurūnaṃ nigame bhāsitaṃ.

Pāyāsisutta

Pucchā – pāyāsi suttaṃ panāvuso kattha kaṃ ārabha kismiṃ vatthusmiṃ kena bhāsitaṃ.

Vissajjanā – kosalesu bhante setabyānāma kosalānaṃ nagaraṃ uttarena setabyaṃ siṃsapāvane āyasmatā kumārakassapena pāyāsiṃ rājaññaṃ ārabha bhāsitaṃ, pāyāsissa bhante rājaññaṃ evarūpaṃ pāpakaṃ diṭṭhigataṃ uppannaṃ hoti, itipi natthi paroloko natthi sattā opapātikā natthi sukata dukkaṭānaṃ kammānaṃ phalaṃ vipākoti, tasmim bhante vatthusmiṃ bhāsitaṃ.

Pucchā – tatthāvuso pāyāsissa rājaññaṃ diṭṭhipakāsanāca āyasmato kumārakassapattherassa diṭṭhiviniṭṭhanakathā ca anekavāraṃ āgatā, tatthāvuso paṭhamam pāyāsi rājañño attano diṭṭhiṃ katham pakāsesi, kathañcāyasmā kumārakassapo taṃ micchādiṭṭhiṃ viniveṭhesi.

Vissajjanā – pāyāsi bhante rājañño āyasmantaṃ kumārakassapaṃ upasaṅkamitvā etadavoca “ahañhi bho kassapa evaṃ vādī evaṃ diṭṭhi itipi natthi paroloko, natthi sattā opapātikā, natthi sukata dukkaṭānaṃ kammānaṃ phalaṃ vipāko” ki, evaṃ kho bhante pāyāsirājañño attano micchādiṭṭhiṃ āyasmato kumārakassapassa santike pakāsesi. Āyasmā ca kumārakassapo sakkhikāraṇaṃ candimasūriyaupamaṃ dassetvā pāyāsissa rājaññaṃ taṃ pāpakaṃ diṭṭhigataṃ viniveṭhesi.

Sādhu sādhu āvuso, sādhu kho āvuso āyasmā kumārakassapo pāyāsissa rājaññaṃ micchādiṭṭhikassa saddhammavimukhibhūtaṃ paccakkhato paralokaṃ dassetvā taṃ micchādiṭṭhiṃ viniveṭhesi.

Pucchā – atha panāvuso pāyāsirājañño dutiyampi kīdisaṃ sādhakapariyāyaṃ dassetvā attano vādaṃ patitṭhāpesi, kathañcāyasmā kumārakassapo taṃ micchāvādaṃ sahadhammena suniggahaṃ niggahetvā dhammavādaṃ patitṭhāpesi.

Vissajjanā – dutiye pana bhante pāyāsirājañño attano mittāmacce ñātisālohite duccharitasamaṅgino kālaṃkate sādhakapariyāyaṃ dassetvā attano micchāvādaṃ patitṭhāpesi, āyasmā ca kumārakassapo coraupamāya taṃ micchāvādaṃ sahadhammena suniggahaṃ niggahetvā dhammavādaṃ patitṭhāpesi.

Sādhu sādhu āvuso, sādhu kho āvuso yaṃ āyasmā kumārakassapo uppannaṃ parappavādaṃ sahadhammena suniggahaṃ niggahetvā dhammavādaṃ patiṭṭhāpesi.

Pucchā – atha panāvuso pāyāsirājañño tatiyampi kīdisaṃ sādhaḥka pariyāyaṃ dassetvā attanovādaṃ patiṭṭhāpesi, kathañcāyasmā kumārakassapo taṃ micchāvādaṃ sahadhammena suniggaha niggahetvā dhammavādaṃ patiṭṭhāpesi.

Vissajjanā – tatiyampana bhante pāyāsirājañño attano mittāmacce ñāṭisālohite sucaritasamaṅgino kālaṃkate dassetvā attano micchāvādaṃ patiṭṭhāpesi, āyasmā ca kumārakassapo gūthakūpe patapurisopamāya taṃ micchāvādaṃ sahadhammena suniggahitaṃ niggahetvā dhammavādaṃ patiṭṭhāpesi.

Sādhu sādhu āvuso, sādhu kho āvuso yaṃ āyasmā kumārakassapo uppannaṃ parappavādaṃ sahadhammena suniggahaṃ niggahetvā dhammavādaṃ patiṭṭhāpesi.

Pucchā – āyasmatā āvuso kumārakassapena purimadivase pucchitavissajjitakkamena gūthakūpapurisapamāya micchāvādaṃ paṭikkhipitvā dhammavāde patiṭṭhāpiyamāne piyāsirājañño

Catutthaṃ vā pañcamaṃ vā kīdisaṃ sādhaḥkapariyāyaṃ dassetvā attanovādaṃ patiṭṭhāpesi, kathañcāyasmā kumārakassapo sahadhammena taṃ micchāvādaṃ paṭikkhipitvā dhammavādaṃ patiṭṭhāpesi.

Vissajjanā – pāyāsi bhante rājañño āyasmatā kumārakassapena gūthakūpe nimuggapuriso pamāya micchāvādaṃ suniggahitaṃ niggahetvā dhammavāde patiṭṭhāpite catutthaṃ vā pañcamaṃ vā attano mittāmacce ñāṭisālohite samādinna pañcasīle sādhaḥkapariyāyaṃ dassetvā attano micchāvādaṃ patiṭṭhāpesi. Āyasmā ca kumārakassapo tāvatimsadevopamāya ca jaccandhopamāya cāti dvīhi upamāhi taṃ pāpakaṃ diṭṭhigataṃ sahadhammena suniggahitaṃ niggahetvā, dhammavādaṃ patiṭṭhāpesi.

Sādhu sādhu āvuso, sādhu kho āvuso yaṃ kumārakassapo pāyāsissa rājaññassa dve upamāyo dassetvā uppannaṃ pāpakaṃ micchāvādaṃ sahadhammena saniggahaṃ niggahetvā dhammavādaṃ patiṭṭhāpesi.

Pucchā – atha panāvuso pāyāsirājañño chaṭṭhampi kīdisaṃ sādhaḥkapariyāyaṃ dassetvā attano vādaṃ patiṭṭhāpesi, kathañcāyasmā kumārakassapo sahadhammena taṃ micchāvādaṃ suniggahaṃ niggahetvā dhammavādaṃ patiṭṭhāpesi.

Vissajjanā – chaṭṭhaṃ pana bhante pāyāsirājañño sīlavante samaṇabrāhmaṇe kalyāṇadhamme jīvitukāme amaritukāme

Sukhakāme dukkhapaṭikūle sādhaḥkapariyāyaṃ dassetvā attano vādaṃ patiṭṭhāpesi, āyasmāca kumārakassapo gabbhinī upamāya taṃ micchāvādaṃ sahadhammena suniggahitaṃ niggahetvā dhammavādaṃ patiṭṭhāpesi.

Sādhu sādhu āvuso, sādhu kho āvuso yaṃ āyasmā kumārakassapo gabbhinīupamaṃ dassetvā taṃ micchāvādaṃ paṭikkhipitvā dhammavādaṃ patiṭṭhāpesi.

Pucchā – atha panāvuso pāyāsirājañño sattamaṃpi kīdisaṃ sādhaḥkapariyāyaṃ dassetvā attano vādaṃ patiṭṭhāpesi, kathañcāyasmā kumārakassapo taṃ micchāvādaṃ sahadhammena suniggahaṃ niggahetvā dhammavādaṃ patiṭṭhāpesi.

Vissajjanā – sattamaṃ pana bhante pāyāsirājañño kubbhiyaṃ pakkhipitvā māritapurisaṃ sādhaḥkariyāyaṃ dassetvā attano vādaṃ paṭiṭṭhāpesi, āyasmāca kumārakassapo supinakūpamāya taṃ micchāvādaṃ sahadhammena suniggahitaṃ niggahetvā dhammavādaṃ paṭiṭṭhāpesi.

Sādhu sādhu āvuso, sādhu kho āvuso yaṃ āyasmā kumārakassapo supinakūpamaṃ dassetvā uppannaṃ micchāvādaṃ sahadhammena suniggahaṃ niggahetvā dhammavādaṃ paṭiṭṭhāpesi.

Pucchā – atha panāvuso pāyāsirājañño aṭṭhamampi navamampi kathetabbaṃ kathetvā dasamaṃ kīdisaṃ sādhaḥkariyāyaṃ dassetvā attano vādaṃ paṭiṭṭhāpesi, kathañcāyasmā kumārakassapo sahadhammena taṃ micchāvādaṃ paṭinissajjāpesi.

Vissajjanā – aṭṭhamampi bhante navamampi pāyāsirājañño yaṃ vā taṃ vā pariyaṃ dassetvā attano vādaṃ paṭiṭṭhāpesi, dasamaṃ pana bhante pāyāsirājañño chaviādīni chinditvā māritapurisaṃ sādhaḥkariyāyaṃ dassetvā attano vādaṃ paṭiṭṭhāpesi, āyasmā ca kumārakassapo aggikajaṭilopamāya taṃ micchāvādaṃ sahadhammena suniggahitaṃ niggahetvā dhammavādaṃ paṭiṭṭhāpesi.

Paṭinissajjetaṃ rājañña pāpakaṃ diṭṭhigataṃ. Paṭinissajjetaṃ rājañña pāpakaṃ diṭṭhigataṃ.

Sādhu sādhu āvuso, sādhu kho āvuso yaṃ āyasmā kumārakassapo opāyikaṃ upamaṃ dassetvā taṃ pāpikaṃ micchādiṭṭhiṃ paṭinissajjāpesi, yaṃ tassa bhavyeṃ dīgharattaṃ hitāya sukhāya.

Pucchā – āyasmatā āvuso kumārakassapena purimadivase pucchitavissajjitākārena pāyāsissa rājaññassa aggikajaṭilopamaṃ dassetvā tasmim̐ pāpake diṭṭhigate paṭinissajjāpīte so tāva therassa vacanaṃ anādiyitvā kīdisaṃ paccanīkakathaṃ kathesi, kathañca thero karuṇāsītaladaya hutvā aparampi upamaṃ dassetvā taṃ pāpakaṃ diṭṭhigataṃ paṭinissajjāpesi.

Vissajjanā – pāyāsi bhante rājañño āyasmatā kumārakassapena aggikajaṭilopamaṃ dassetvā taṃ pāpakaṃ diṭṭhigataṃ paṭinissajjāpīte kiñcāpi bhavaṃ kassapo evamāha, atha kho nevāhaṃ sakkomi idaṃ pāpakaṃ diṭṭhigataṃ paṭinissajjitunti evamādikaṃ paccanīkakathaṃ kathesi, thero ca bhante kumārakassapo dve satthavāhopamaṃ dassetvā taṃ pāpakaṃ micchāvādaṃ paṭinissajjāpesi.

Sādhu sādhu āvuso, sādhu kho āvuso yaṃ āyasmā kumārakassapo pāyāsissa rājaññassa dve satthavāhopamampi dassetvā taṃ pāpakaṃ diṭṭhigataṃ paṭinissajjāpesi, tañhi tassa ca tadanuyāyīnañca bhavyeṃ dīgharattaṃ hitāya sukhāya.

Pucchā – evaṃ panāvuso āyasmatā kumārakassapena yathā vuttāhi bahūhi upamāhi ca aparāhi gūthabhārikaakkhadhuttakopamāhi ca tasmim̐ pāpake diṭṭhigate vissajjāpīte so tāva therassa vacanaṃ anādiyitvāva pacchimapaṭikkhepavasena kīdisaṃ paccanīkakathaṃ kathesi, kathañca thero karuṇāsītaladaya hutvā pacchimampi upamaṃ dassetvā taṃ pāpakaṃ diṭṭhigataṃ paṭinissajjāpesi.

Vissajjanā – pāyāsi bhante rājañño evaṃ therena nānūpamāhi tasmim̐ pāpake diṭṭhigate paṭinissajjāpītepi purimanayeneva therassa paccanīkakathaṃ kathesi, theropi ca bhante pacchimaṃ sāṇabhārikūpamaṃ dassetvā karuṇāsītaladaya taṃ pāpakaṃ diṭṭhigataṃ paṭinissajjāpesi.

Sādhu sādhu āvuso, sādhu kho āvuso yaṃ āyasmā kumārakassapo pāyāsissa rājaññassa sāṇabhārikopamampi dassetvā taṃ pāpakaṃ diṭṭhigataṃ paṭinissajjāpesi, tañhi tassa ca tadanuyāyīnañca bhavyeṃ dīgharattaṃ hitāya sukhāya.

Pucchā – imāya panāvuso pacchamikāya sāṇabhārikopamāya dassitāya pāyāsirājañño therassa dhammadesanānubhāvena imasmim̐ dhammavinaye pasanno hutvā kīdisaṃ pasannākāramakāsi, kathañca āyasmantaṃ kumārakassapaṃ anusāsanim̐ yāci, kathañcāyasmā kumārakassapo anusāsi.

Vissajjanā – imāya ca pana bhante upamāya dassitāya pāyāsī rājañño “purimeneva ahaṃ opammena bhoto kassapassa attamano abhiraddho evamādinā bhante pāyāsīrājañño imasmim dhammavinaye āyasmato kumārakassapassa dhammadesanāya pasanno pasannākāramakāsi. Icchāmi cāhaṃ bho kassapa mahāyaññaṃ yajitum, anusāsatu maṃ bhavaṃ kassapo yaṃ mamassa dīgharattaṃ hitāya sukhāyāti pāyāsī rājañño āyasmantaṃ kumārakassapaṃ anusāsaniṃ yāci, āyasmā ca bhante kumārakassapo dukkhetto dubbhūme pavuttabījopamāya dussīlesu dinnadānassa na mahapphalabhāvaṃ dassetvā sukhetto subhūme pavuttabījopamāya sīlavantesu dinnadānassa mahapphalabhāvaṃ dassetvā pāyāsīṃ rājaññaṃ manusāsī.

Pucchā – kathañcāvuso pāyāsīrājañño dānaṃ adāsī, kathañcassa samparāyo ahoṣi.

Vissajjanā – pāyāsī bhante rājañño asakkaccaṃ dānamadāsī, asahatthā dānamadāsī, acittīkataṃ dānamadāsī, apaviddhaṃ dānamadāsī, so asakkaccaṃ dānaṃ datvā asahatthā dānaṃ datvā acittīkataṃ dānaṃ datvā apaviddhaṃ dānaṃ datvā kāyassabhedā paraṃ maraṇā cātumahārājikānaṃ devānaṃ sahaḃyataṃ upapajji suññaṃ serīsakaṃ vimānaṃ.

Pucchā – tenāvuso bhagavatā jānatā passatā arahatā sammāsambuddhena pāthiyavagge paṭhamam pāthiyasuttaṃ kattha kaṃ ārabha kismiṃ vatthusmiṃ bhāsitaṃ.

Vissajjanā – mallesu bhante anupīye nāma mallānaṃ nigame bhaggavagottaṃ paribbājakaṃ ārabha bhāsitaṃ, bhaggavagotto bhante paribbājako bhagavantaṃ etadavoca “purimāni bhante divasāni purimatarāni sunakkhatto licchaviputto yenāhaṃ tenupasaṅkami, upasaṅkamitvā maṃ etadavoca “paccakkhāto dāni mayā bhaggava bhagavā, na dānāhaṃ bhagavantaṃ uddissa viharāmi”ti, kacce taṃ bhante tatheva, yathā sunakkhatto, licchaviputto avacā”ti, tasmim bhante vatthusmiṃ bhāsitaṃ.

Udumbarikasutta

Pucchā – udumbarikasuttaṃ panāvuso bhagavatā kattha kaṃ ārabha kismiṃ vatthusmiṃ bhāsitaṃ.

Vissajjanā – rājagahe bhante nigrodhaṃ paribbājakaṃ ārabha bhāsitaṃ, nigrodho bhante paribbājako bhagavato parammukhā bhagavantaṃ yeveva ārabha anekavihitaṃ abhūtakathaṃ kathesi, tasmim vatthusmiṃ bhāsitaṃ.

Cakkavattisutta

Pucchā – cakkavattisuttaṃ panāvuso bhagavatā kattha kaṃ ārabha kismiṃ vatthusmiṃ bhāsitaṃ.

Vissajjanā – magadhesu bhante mātulāyaṃ sambahule bhikkhū ārabha attajjhāsayena suttanikkhepena bhagavatā bhāsitaṃ.

Aggaññasutta

Pucchā – aggaññasuttaṃ panāvuso bhagavatā kattha kaṃ ārabha kismiṃ vatthusmiṃ bhāsitaṃ.

Vissajjanā – sāvatthiyaṃ bhante pubbārāme migāramātupāsāde vāseṭṭhaṃ pabbajitaṃ ārabha bhāsitaṃ, brāhmaṇā bhante vāseṭṭha bhāradvāje pabbajite akkosanti paribhāsanti attarūpāya

Paribhāsāya paripuṇṇāya no aparipuṇṇāya, tasmim bhante vatthusmiṃ bhāsitaṃ.

Pucchā – sampasādanīya suttam panāvuso kattha kena bhāsitaṃ.

Vissajjanā – nālandāyaṃ bhante pāvārikambavane āyasmatā sārīputtana bhāsitaṃ.

Pāsādikasutta

Pucchā – pāsādikasuttam panāvuso bhagavatā kattha kaṃ ārabba kismiṃ vatthusmiṃ bhāsitaṃ.

Vissajjanā – sakkesu bhante vedhaññānāma sakyānaṃ ambavane pāsāde cundaṃ samaṇuddesaṃ ārabba bhāsitaṃ, cundo bhante samaṇuddeso pāvāyaṃ nigaṇṭhassa nāṭaputtassa kālaṃ kiriyāya bhinnānaṃ nigaṇṭhānaṃ dvedhikajātānaṃ bhaṇḍanajātānaṃ kalahajātānaṃ vivādāpannānaṃ aññamaññaṃ mukhasattīhi vitujjanakāraṇaṃ āyasmato ānandassa ārocesi, āyasmā ca bhante ānando bhagavato etamatthaṃ ārocesi, tasmīṃ bhante vatthusmiṃ bhāsitaṃ.

Lakkhaṇasutta

Pucchā – lakkhaṇasuttam panāvuso bhagavatā kattha bhāsitaṃ.

Vissajjanā – sāvattīyaṃ bhante jetavanamahāvihāre bhāsitaṃ.

Sīngālasutta

Pucchā – sīngālasuttam panāvuso bhagavatā kattha kaṃ ārabba kismiṃ vatthusmiṃ bhāsitaṃ.

Vissajjanā – rājagahe bhante sīngālaṃ gahapatiputtam ārabba bhāsitaṃ, sīngālo bhante gahapatiputto kālasseva uṭṭhāya rājagahā nikkhamitvā allavattho allakeso pañjaliko puthudisā namassati puratthimaṃ disaṃ dakkhiṇaṃ disaṃ pacchimaṃ disaṃ uttaraṃ disaṃ heṭṭhimaṃ disaṃ uparimaṃ disaṃ, tasmīṃ bhante vatthusmiṃ bhāsitaṃ.

Āṭānāṭiyasutta

Pucchā – āṭānāṭiyasuttam panāvuso bhagavatā kattha kismiṃ vatthusmiṃ bhāsitaṃ.

Vissajjanā – rājagahe bhante giṃjhakūṭe pabbate bhāsitaṃ, bhagavati bhante rājagahe viharati cattāro mahārājāno catuddisaṃ rakkhaṃ ṭhapetvā catuddisaṃ gumbaṃ ṭhapetvā catuddisaṃ ovaraṇaṃ ṭhapetvā kevalakappaṃ giṃjhakūṭapabbataṃ obhāsetvā yena bhagavā tenupasaṅkamimsu, upasaṅkamitvā bhagavantaṃ abhivādetvā ekamantaṃ nisīdimsu, ekamantaṃ nisīno kho bhante vessavaṇo mahārājā āṭānāṭiyaṃ rakkhaṃ bhagavato ārocesi bhikkhūnaṃ bhikkhunīnaṃ upāsakānaṃ upāsikānaṃ phāsuvihārāya, tasmīṃ bhante vatthusmiṃ bhāsitaṃ.

Saṅgītisutta

Pucchā – saṅgīti suttam panāvuso kattha kena bhāsitaṃ.

Vissajjanā – pāvāyaṃ bhante āyasmatā sārīputtana bhāsitaṃ.

Dasuttarasutta

Pucchā – dasuttarasuttam panāvuso kattha kena bhāsitaṃ.

Vissajjanā – dasuttarasuttaṃ bhante campāyaṃ gaggarāya pokkharāṇiyā tīre āyasmatā sārīputtēna bhāsitaṃ.

Pucchā – ke āvuso sikkhanti.

Vissajjanā – sekkhā ca bhante puthujjanakalyāṇakā ca sikkhanti.

Pucchā – ke āvuso sikkhitasikkhā.

Vissajjanā – arahanto bhante sikkhitasikkhā.

Pucchā – kassa āvuso vacanaṃ.

Vissajjanā – bhagavato bhante vacanaṃ arahato sammāsambuddhassa.

Pucchā – kenāvuso ābhatāṃ.

Vissajjanā – paramparāya bhante ābhatāṃ.